

Papia Jems da Mandagit

But piso gen

Papia on Yesu dakon padige Jems da mandagit. Jems unun Yesu yolyol amin Jerusalem egipgwit dakon kila amini egipgut. (Yabekbi 15.13 unudon koki.)

Jems da on papia mandagit unjungwan Piŋkop dakon miŋat aminyo da ni anpak tagisi ban yolek ani dakon gen tagisi morapmi mandagit. Miŋat aminyo da nandak nandak tagisi ban timigek ae Piŋkop dakon gen pakyaŋsi abidan kimotni do tilak gen morapmi mandagit.

Jems da gen tebai yaŋ yosok: Yesu nandan gadaŋ imjak amin isal egipmi mini. Amin do anpak tagisi ban an yomiŋ kimotjak, unun da gak nandan gadat tebaisi asal yaŋ miŋat aminyo yoliŋban kokdan.

Nin paŋkewalon tebaisi atneŋ, yaŋ aŋek Piŋkop gat tagisi egipneŋ (Kilapmi 1.1-18)

1 ¹ Nak Jems, Piŋkop ae Amin Tagi Yesu Kristo dakon oman amini. Papia on Israel amin 12 kabi ji kokupji yipmaŋek miktim ŋwakŋwarikon kiwit da ekwaŋ ji do mandaŋ yipbo obisak. Gildat tagisi.

Paŋkilit da nin paŋteban asak

² Not kabi, paŋkilit mibili mibili altaŋ damni bisapmon butjik kinda jikon dima tosak, kisik kisik daŋin jikon tosak. ³ Nido ji nandaŋ, yo noman taŋek nandaŋ gadatji paŋkilikdak, unun da tebai agek jigi guramitneŋ dakon anpak paŋalon asak. ⁴ Toktogisi tebaisi agek jigi guramitni, yaŋ aŋakwa unun anpak da jikon teban tosak. Yaŋ aŋek Piŋkop dakon anpak kinda do wadak wadak dima ani. Anpakji da tagisi ae kilegisi akdisak.

Nandaŋ kokwin kilegi do wadak wadak asak amin unun bisit asak

⁵ Ji da binapmon amin kinda nandaŋ kokwin kilegi do wadak wadak asak kaŋ, Piŋkop da nandak nandak imjak do bisit asak, aŋakwan Piŋkop

^a 1.1 Mt 13.55; Ya 15.13; Gal 1.19; 1Pi 1.1 ^b 1.2 Ro 5.3-5 ^c 1.3 1Pi 1.7 ^d 1.5 YT 2.3-6

da imdisak. Piŋkop da amin morap do yo morapmi yomisak, ae bisit iyaŋ amin do yaŋba yokwi tok dima aŋ yomisak. ⁶Mani uŋun amin nandaŋ gadatsi aŋek Piŋkop do bisit asak. Nandaŋ gadatni timisok di yipmaŋ degek “Piŋkop da uŋun namdisak bo dima” yaŋ dima nandisak. Nido amin but bamot aŋ uŋun tap pakbi mirim da piŋonakwan tamalikgaŋ uŋun yombem. ⁷Uŋuden amin Piŋkop da yo kinda namdisak yaŋ dimasi nandisak. ⁸Uŋun amin dakon nandak nandakni yo dikon di yopmaŋ yopmaŋ asak, aŋek aŋpak morap asak uŋun kosit naŋ gin kaŋek dima agisak.

Yoni mini amin gat ae yoni morapmi amin gat dakon gen

⁹Not kinda yoni mini kaŋ, kisik kisik tagi asak, nido Piŋkop da dabilon man madepni toŋ da egisak. ¹⁰^eAe yoni morapmi amin Piŋkop da mani abiŋ yipmaŋdak, do kisik kisik tagi asak, nido jareŋ da biripmikwaŋ uŋun da tilak kimotdaŋ. ¹¹Gildat da wisak bisapmon gildat tepmisi wusiŋek joŋ pindakban kibidaŋ mudoaŋ. Joŋ dakon jareŋi maŋ mudaŋakwa, tilimni tagisi uŋun wagil pasilgaŋ. Uŋudeŋ gin yoni morapmi amin pini mibili mibili sigin aŋek kimot akdaŋ.

Piŋkop yo tagisi aŋ niminek yokwikon dima paŋkisak

¹²Paŋkewal morap noman toŋon jigi guramigeŋek tebai akdak amin uŋun kisik kisik tagi asak. Nido paŋkilit morapmon tebai atjak kaŋ, Piŋkop da miŋat aminyo but dasi galak taŋ imaŋ uŋun do egip egip dakon pelit tim tilimi toŋ yom do yaŋ teban tok agit, uŋun imdisak.

¹³Yokwi ak do paŋkilit noman taŋ iba “Piŋkop da aŋkilikban asat” yaŋ amin kinda da dima yogogi. Nido, yokwi da Piŋkop aripmi dima aŋkilitjak, ae Piŋkop da amin kinda yokwi asak do dima aŋkilikdak. ¹⁴Mani, nin kaloŋ kaloŋ dakon but dakon galaktok yokwi da paŋkilikban yokwi agak dakon galaktok noman tosok. ¹⁵Uŋun but dakon galaktok yokwi uŋun miŋat kinda da monji kwapmi awildak yombem da don yokwi aŋalon aban noman tosok. Ae yokwi da si tagosok bisapmon kimot aŋalon asak.

¹⁶Notnonisi, ji bikbik iba yokwi ami da ji di paŋkilikban. ¹⁷But galak dakon yo morap tagisisi uŋun Dat da yopban kwen da paŋ. Dat, kundukon tenŋeŋi morap wasagit amin, uŋun aŋpakni kulabik dimasi asak. Uŋun gildat paŋopmon yo dakon wupni dubak toŋ da ae don pisip toŋ uŋun yombem dima. ¹⁸^fUŋun yo morap wasagitgwan amin nin da wukwini egipneŋ do aŋek iyi dakon galaktok yolek gen bami niban miŋat monjini dagagimaŋ.

^e 1.10 Ais 40.6-7 ^f 1.18 Jn 1.13

Nin Piŋkop do bamisi nandaŋ gadaŋ imamaŋ kaŋ, aŋpak tagisi kisi aneŋ (Kilapmi 1.19–5.6)

Nin geni nandaŋek guramitneŋ

¹⁹Not kabino, pakyaŋsi nandani. Ji morap gen nandak do mirak pakyaŋsi yopni, mani gen tepmi dima yoni, ae butjap tepmi dima nandani. ²⁰ⁱNido, amin dakon butjap da Piŋkop dakon aŋpak kilegi dima aŋalon asak. ²¹ʰYaŋ do aŋek aŋpak iŋani mibili mibili gat ae aŋpak yokwi morap jikon madepsi ireŋ tosok, uŋun wiriritni. Aŋek disi do nandaba piŋakwa egek Piŋkop da gen uŋun butjikon kwaokgit uŋun naŋ abidoni. Gen uŋun da ji yokwikon baŋ tagi timitjak.

²²ʱMani gen uŋun isal dogin dima nandani, si guramitni. Isal dogin nandaŋ kaŋ, disi baŋ paŋkewalgaŋ. ²³Amin kinda Piŋkop gen isal dogin nandaŋek dima guramikdak kaŋ, uŋun amin kinda da wupni pakbi idapmon kosok uŋun yombem. ²⁴Uŋun iyi dakon tomno dabilni kosok, mani kiŋek tomno dabilni uŋun niaŋen uŋun tepmisi iŋtosok. ²⁵ʱMani gen teban gwaljiŋi minisi uŋun da yokwi dakon tapmim tuwilek nin pulugaŋ nipmaŋdak, do amin kinda da uŋun gen teban pakyaŋsi kaŋban piŋaŋakwan geni dima iŋtaŋek guramitjak kaŋ, Piŋkop da uŋun amin aŋpuluŋaŋakwan pi morap asak uŋun tagisisi noman tokdaŋ.

²⁶ᵏAmin kinda “nak Piŋkop gawak imim silip aŋ kimokdot” yaŋ nandisak, mani gen kagani dakon kila tagi dima aŋek gen yokwi morapmi yosok kaŋ, uŋun amin iyi naŋ top aŋkewaldak, ae Piŋkop gawak imim dakon silip asak uŋun yo isalisi. ²⁷Piŋkop gawak imim dakon silip Piŋkop Dat da kaŋban gwaljiŋi minisi ae gulusuŋni mini asak uŋun yaŋ: Nin miŋat monjiyo meŋ datyoni kimakbi gat, ae sakwabat gat do nandak nandak aŋek paŋpuluŋaŋek jigini guramitneŋ, ae nin dakon aŋpak kila tagisi aneŋ, aŋapno miktim on dakon aŋpak yokwi da paŋupbal aban Piŋkop da dabilon iŋani dima egipneŋ.

Nin amin morap kisi do aŋpak aripsi gin aneŋ

2 ¹ʱNot kabino, Amin Taginin Yesu Kristo tilimni madepsi, uŋun nandaŋ gadaŋ imaŋ, do amin kinda do aŋpak tagi aŋek ae kinda do manji imni kaŋ uŋun tagi dima. ²Amin kinda yik imalyo tagisi baŋ paŋek ae kisit tamikon sip gol naŋ wasaŋbi kinda yipmaŋek ji dakon muwut muwut yutjikon wigakwan yoni mini amin kinda imalni dagaŋbi ae yokwisi kinda uŋunyo kisi wugisak, ³aŋakwal ji da aŋpak tagi amin yik imalyo tagisi baŋ pak uŋun do aŋ imiŋek

ⁱ 1.20 NNA 7.9 ʰ 1.21 Kol 3.8; 1Pi 2.1 ᵏ 1.22 Mt 7.26; Ro 2.13 ʱ 1.25 Ro 8.2; Jem 2.12
ᵏ 1.26 Kap 141.3 ʱ 2.1 Ya 10.34; Jem 2.9

yaŋ iyaŋ, “Gak obiŋ on tamo tagisikon yikgi”, ae yoni mini amin yaŋ iyaŋ, “Gak amodon akgi” bo ae “Nak da kandap da kapmatjok mibilikon yikgi” yaŋ iyaŋ kaŋ, ⁴amin diwari tagi ae diwari yokwi yaŋ nandaŋ yaŋ asak. Yaŋ aŋek ji kokwin amin dagaŋek nandak nandak yokwikon da kokwin aŋ.

⁵Not kabino nandani. Miktim amin da dabilon yoni mini ekwaŋ amin, uŋun baŋgin Piŋkop da nandaŋ gadat madepsi tugaŋ yomiŋakwan egipni do kili manjigit. Kalip yaŋ teban tok yaŋ agit, amin but dasi galak taŋ imaŋ uŋun yopban iyi amin kila asak da kagagwan egipdaŋ, do yoni mini amin iyi amin kila asak da kagagwan egipni do kili manjigit. ⁶Mani ji da yoni mini amin uŋun nandaba piŋban yomaŋ. Namin da pabiŋ depmaŋek jigi damiŋek ji timik gen pikon depmaŋgaŋ? Uŋun yoni morapmi amin dagaŋ anpaŋk uŋun aŋ. ⁷Piŋkop da Kristo dakon mani tagisi jikon yipgut, naŋ namin da uŋun do nandaban piŋakwan jigilak gen yoŋ? Uŋun yoni morapmi amin dagaŋ yoŋ.

⁸“Piŋkop uŋun kila amin madepnin, uŋun da papianikon gen teban kinda nimgut da yaŋ yosok:

“Gaga do but dasi niaŋ galak tosol, uŋudeŋ gin amin do but dasi galak taŋ yobi.”

Ji gen teban uŋun but dasi guramitni kaŋ, ji anpaŋk tagisi aŋ. ⁹Mani amin kinda do anpaŋk tagi aŋek kinda yum koni kaŋ, uŋun yokwi aŋ. Aŋakwa gen teban uŋun da yaŋ nolisak, ji gen teban tuwil tuwil amin. ¹⁰Amin kinda Piŋkop dakon gen teban morap kisi guramigek kalonji kinda naŋgin kiriŋikdak kaŋ, uŋun amin gen teban morap kisi kiriŋikdak da arip gulusuŋni toŋ. ¹¹“Nido, Piŋkop da yaŋ yagit:

“Miŋat eyo kili abi, ji yumabi anpaŋk dima ani.”

Ae yaŋ kisi yagit:

“Ji amin dima dapba kimotni.”

Do yumabi anpaŋk dima agil, mani amin kinda aŋakbi kimakgit kaŋ, gak gen teban morap tuwil tuwil amin kinda dagagil.

¹²Piŋkop da anpaŋkji kokwin asak bisapmon uŋun ji pulugaŋ depmaŋdak dakon gen teban uŋun do nandaŋek kokwin akdisak. Do ji uŋun do nandaŋek amin do bupmi nandaŋek toktogisi gen yogokji gat ae anpaŋkji gat dakon kila tagisi ani. ¹³“Nido amin kinda amin do bupmi dima nandagit kaŋ, Piŋkop da gen pikon kokwin asak bisapmon bupmisok kinda dima nandaŋ imdisak. Mani amin do bupmi nandagit amin uŋun gen pikon teban tokdisak.

Nandaŋ gadat anpaŋk tagi dima paŋalon asak, uŋun nandaŋ gadat yo isali

¹⁴Not kabino, amin kinda da “Nak Kristo nandaŋ gadaŋ imisat” yaŋ yosok, mani anpaŋk tagi dima asak kaŋ, nandaŋ gadat uŋuden da

m 2.5 1Ko 1.26-28 n 2.8 Mt 19.19; Gal 5.14 o 2.9 GT 1.17 p 2.10 MS 19.37;
IDT 20.7-12,24; Mt 5.19 q 2.11 TP 20.13-14; Ro 13.9 r 2.12 Gal 6.2; Jem 1.25; 1Pi 2.16
s 2.13 Mt 5.7; 18.32-35

yokwikon banj tagi abidosak? Uñun dimasi. ¹⁵Pañmuwukbi notnin kinda bo ae saminin kinda imalni yokwi gin, anjakwan japni mini kanj, ¹⁶jikon da kinda da yanj iyisak, “Butgo yawori tarajakwan panjki njanali egipbi, ae kinj jap nanjek butgo tugosak”, mani imal bo jap dima imisak. Isal gen gin iyik uñun da nianj anjplugosak?

¹⁷Nandanj gadat dakon anjak kisi yanj gin. Nandanj gadat isal nanjek anjak tagi kinda dima noman tosak kanj, uñun yo isali.

¹⁸“Mani amin kinda da yanj yosak, “Amin diwari nandanj gadat anjakwa amin diwari anjak tagi anj.”

Yanj yanjan kobogi yanj yokdisat, “Gak nandanj gadat anjek anjak tagiyo kisi dima abi kanj, nak nianjon da gak dakon nandanj gadat kokenj? Mani, nak dakon anjak tagi da nandanj gadatno golikdisak.”

¹⁹Gak “Piñkop kalonji dagin egisak” yanj nandanj gadasal. Uñun tagi. Mani konj yo kisi yanj gin nandanj gadanjek madepsi nimnimikganj.

²⁰Nandanj kokwingo tagi dima amin, gak nandanj gadat gin anjek anjak tagiyo kisi dima abi kanj, nandanj gadatgo uñun yo isali. Gak gen on dakon mibili nandak do nandisal? Kanj, nandaki, ²¹“kalip babiknin Abraham da monji Aisak altakon yipmanjek Piñkop do paret aban Piñkop da yo agit uñun nanjek amin kilegi yanj iyigit. ²²“Pakyanji nandaki. Abraham dakon nandanj gadat gat ae anjakni tagi uñun kalonji gadagimal, anjakwan uñun anjak tagi da nandanj gadatni aripmisi agit. ²³“Do Piñkop gen papiakon gen kinda tosoq uñun bamì noman tagit. Gen uñun yanj:

“Abraham uñun Piñkop do nandanj gadat aban, Piñkop da amin kilegi yanj iyigit.”

Ae amin da Abraham do Piñkop dakon notnisi yanj iyiwit. ²⁴Do yanji nandani, amin kinda isal nandanj gadat dogin Piñkop da amin kilegi yanj dima iyisak. Amin kinda anjak kilegi asak uñun do nandanjek amin kilegi yanj iyisak.

²⁵Yanjin kosit oba miñat Reap da amin panman ak amin bamot uñun uwal da dapni yanj do panjisibinejek yabekban kosit njwaknwat nanj tobil kigimal, do Piñkop da miñat kilegi yanj iyigit. ²⁶Nin nandamanj, amin kinda wupni kili yipmanj dekgit kanj, uñun amin kili kimakgit. Yanjin, amin kinda nandanj gadat anjek anjagon dima yipmanjak uñun amin nandanj gadatni kili kimakgit.

Nin gen yogoknin dakon kila tagisi anen

3 ¹Not kabino, jikon da amin morapmi da Piñkop gen yoyindet pi ak do nandak nandak dima ani. Nido ji nandanj, Piñkop da miñat

^t 2.15 1Jn 3.17 ^u 2.18 Gal 5.6 ^v 2.21 WW 22.9-12 ^w 2.22 Ibr 11.17-18

^x 2.23 WW 15.6; 2KAG 20.7; Ais 41.8 ^y 2.25 Jos 2.1-21; Ibr 11.31

aminyo dakon anpak kokwin asak bisapmon miñat aminyokon yoyinjet pi aŋ amin uñun pakyañsi kokwin akdisak.

²Nin kisi morap gulusuñ morapmi amaŋ. Mani amin kinda gen kagani dakon kila aŋek gen yokwi kinda dima yosok kaŋ, uñun amin gwaljigi minisi, ae uñun da giptim diwat morapni kisi kila tagi asak.

³Os da nin dakon galaktok yolek kosit agipni do gen kaganikon ain tim yopmanŋamaŋ. Yaŋ aŋek giptimni kisi iligapno nin dakon galaktok yolek akwaŋ.

⁴Ae tap wakga yo kisi do nandaner. Tap wakga uñun yo madepsi daman, ae mirim madepsi da pisonakwan tap idapmon agisak. Ae tap wakga aŋtobilakwa agisak dakon kindap kwik uñun moniñisisok. Mani tap wakga awildak amin timi kindakon kik do asak kaŋ, uñun tap wakga dakon yo uñun aŋtobil tobil aŋakwan dukwan kik do nandisak uñudon kisak. ⁵Uñuder gin, gen kaga uñun giptim dakon diwari moniŋgok kinda, mani iyi dakon man awigek yo madepsi do yosok.

Kindap moniŋgok kinda da soŋek madepsi aŋek koron soŋek kindap morap tagini sosak. ⁶Gen kaga uñun kindap kinda, yokwini uñun madepsi daman. Uñun da kindap tepmisi kwaŋ sosok uñun da tilak anpak yokwi mibili mibili paŋalon aŋek egip egipnin madepsi paŋupbal asak. Ae Sunduk Tipdomon egisak uñun da amin da gen kagakon kindap uñun yipban sosok.

⁷Amin da joŋ kilap mibili mibili gat, ae minam, ae tuñon amin, ae tap idapmon yo morap ekwaŋ uñun timigek yo uñun kilani aŋakwa uñun da kisiron ekwaŋ. ⁸Mani gen kaga uñun tapmimni madep do amin kinda da iyi dakon gen kaga kila aripmi dima asak. Bisap morapmi gen kaga gen yokwi morapmi yosok. Uñudon amin dapdap marasin yokwi madepsi tugawit da toŋ. ⁹Gen kagakon da Amin Tagi Datnin ankisamaŋ. Mani bisap diwari nin da miñat aminyo Piŋkop da iyi yombem wasagit uñun jobit yomamaŋ. ¹⁰Gisam yomyom gat ae jobit gat kisi uñun gen kaga kalonon daŋin noman tomal. Not kabi, uñun tagi dima. ¹¹Pakbi dabil kalonikon da pakbi si noknogi ae amin da dima noknogi yo kisi aripmi tagi potpori? ¹²Not kabi, pik kindap da olip sop tagi potni? Ae wain nap da pik kindap dakon sopmi tagi potni? Yaŋgin pakbi isipmi da pakbisi aripmi dima dagoni.

Nandak kokwini tagisi amin da anpak tagisi akdisak

¹³Ji da binapmon nandaŋ kokwini tagisi ae nandak nandakni tagisi amin kinda egisak kaŋ, uñun amin bisapmi bisapmi anpak tagisi asak, ae nandaŋ kokwini tagisi do iyi dakon man dima awigisak. Yaŋ aŋakwan amin da kaŋba amin nandaŋ kokwini tagisi ae nandak nandakni tagisi

^z 3.6 Mt 12.36-37; 15.11,18-19 ^a 3.8 Ro 3.13

asak. ¹⁴Mani ji tagisi ekwan amin do nandaba yokwi tok an kaŋ, ae bisapmi bisapmi ji disi dakon man pawigik do kosit wusik an kaŋ, nandan kokwin tagisi gat ae nandak nandakji tagisi gat do kisik kisik dima ani. Top anakwa anpakji da gen bami di abin yipban. ¹⁵Nandan kokwin yokwi unuden Kwen Kokup da dima pisak. Unun on miktim dakon yo gin. Unun Pinjopmon da dima abisak, Sunduk da anjalon asak. ¹⁶Nandani, tagisi ekwan amin do nandaba yokwi tok anek bisapmi bisapmi iyi dakon man pawigik do kosit wusik an amin da binapmon pidok pidok madepsi noman tosok, ae anpak yokwi morap unudon da noman toŋ.

¹⁷Mani amin nandan kokwin tagisi Kwen Kokupmon nani ban timikgan unun da anpak yan an: Mibiltok nandak nandak gwaljigi mini unun yolgan, ae unun da bunon amin gat but kalonji ekwan, ae anpak yawori an yoman, anek pinbisi egek amin diwari dakon gen nandane ekwan, ae amin do bupmisi nandan yominek anpak tagisi anyoman. Unun amin morap kisi do anpak tilak kalonikon gin anyoman. Ae jamba but anpak dima an, unun anpak tagi yol kimokgon. ¹⁸^bNin but kalon ekwaman kaŋ, unun jap yet kwaokgaman yombem. Do unun but kalon anpagon jap da pigaga kwon unun da tilak anpak tagisi da egip egipninon noman tokdan.

Miktim dakon anpak do galak toŋ amin unun Pinjop dakon uwalni

4 ¹Gen emat gat ae butjap ukwayityo binapjikon noman toŋ unun mibili nido noman toŋ? Unun yokwi dakon but suligik dakon anpak mibili mibili butjikon emat an, unun da gen emat ae butjap ukwayityo paŋalon an. ²Ji yo timit do nandan, mani dima timikgan, do ji amin dapba kimokgon. Ji yo do pindak galaktok an, anek unun aripmi dima timitni, do butjap ukwayit yo anek gen emat an. Pinjop da yo damjak do bisit dima an, mibili yan do anek yo dima timikgan. ³Ae yo timit do bisit an bisapmon yo dima timikgan, nido nandak nandakji kilegi dima tanakwan Pinjop bisit an imaŋ. Ji but dakon galaktok yokwi yolek giptimji da kisik kisik asak unun dogin nandan.

⁴Mingat da eni yipmanek kin yumabi anpak asak unun da tilak ji Pinjop kili yipman dek mudan. Nandani, miktim dakon yo do galagi nandisak amin unun Pinjop do kuragisi nandan imisak. Unun dima nandan, ma? Nandani, on miktim not animisak amin, unun Pinjop dakon uwalni dagosok. ⁵Pinjop dakon papia da yan yosok, “Wup unun Pinjop da nin da butgwan yipgut unun yo morap yopman mudane iyi dogin galaktan kimotneŋ do nandisak.” Gen unun gen isali yan nandan, ma? ⁶Mani Pinjop da nin do nandan yawot madepsi an nimisak. Mibili yan do anek Pinjop dakon papia da yan yosok:

^b 3.18 Mt 5.9; Ibr 12.11 ^c 4.1 Ro 7.23 ^d 4.4 Ro 8.7; 1Jn 2.15 ^e 4.6 YT 3.34; 1Pi 5.5

“Piņkop da amin iyi dakon man pawikwaņ amin yo ak do nandaņ uņun dima ani do kosit sopmaņ yomisak, mani amin iyi do nandaba paņ uņun nandaņ yawok yomiņek yo tagi aņ yomisak.”

^{7f}Do ji disi do nandaba piņakwan Piņkop da yoņgamgwan egipni. Sunduk kosit sopmaņ imiņakwa depmaņ dek pasal kikdisak. ^{8g}Piņkop da kapmatjok kini, aņakwa Piņkop ji da kapmatjok apjak. Yokwi pakpak, amin da kisitni pakbikon sugaņba kilegisi aņ, uņun da tilak butjikon yo yokwi toņ uņun sugaņba kilek taņ mudoni. Jamba but amin, butjikon nandak nandak yokwi toņ uņun wiririk mudoni. ⁹But yokwi aņek kunam morapmi tatni. Abisok jikgo yanjaņ amin, kulabik aņek kunam tatni. Abisok jikgo yanjaņ amin, kulabik aņek butji jik taņakwa egipni. ^{10h}Amin Tagi da dabilon disi do nandaba pini. Yaņ ani kaņ, Amin Tagi da ji pawigikdisak.

Nin amin do yaņba yokwi tok dima aneņ

¹¹Not kabi, paņmuwukbi notji diwari do yaņba yokwi tok dima ani. Amin diwari do yaņba yokwi tok asak bo ae notni dakon aņpak kokwin asak, uņun gen teban do yaņba yokwi tok aņek gen teban kokwin asak. Ae gen teban kokwin asal kaņ, gak gen teban dima guramikdal, uņun gen teban dakon kokwin agak amin dagal yaņ asak. ¹²ⁱPiņkop kaloņ dađin gen teban paņalon ađit, uņun kaloņ dađin Gen Kokwin Amin egisak. Ae uņun kaloņ dađin miņat aminyo yokwikon baņ tagi timitjak, ae tagi paņupbal asak. Do gak namin da amin dakon aņpakni kokwin asal?

Nin kwen wigik dima aneņ

^{13j}Jikon amin diwari da yaņ yoņ: “Abisok bo aņwa kokup pap kindakon kiņ moneņ ilit pi aņek bilak kinda egipneņ. Yaņ aņek moneņ morapmi timitneņ.” Yaņ yoņ amin ji do gen yipmaņdat. ^{14k}Ji gen uņuden baņ yoņ, mani aņwa yo ni da noman toni uņun dima nandaņ. Egip egipji mukwa da yaņ noman taņek bisap pisipmisok gin taņek wagil pasilgaņ uņun yombem. ¹⁵Ji yaņ gin yoni kaņ tagi, “Amin Tagi da galak tosagon nin sigin egek yo uņun ak do nandamaņ uņun aneņ.” ¹⁶Mani disi dakon man pawigek disi pi madep akdaņ uņun do yoņ. Uņun yokwisi. ^{17l}Pakyaņsi nandani, amin kinda aņpak tagisi kinda ak do nandaneņ dima asak kaņ, uņun amin diwarini toņ.

Yoni morapmi amin kobogi yokwisi timitdaņ

5 ¹Nandani! Yoni morapmi amin ji do gen yipmaņdat. Kunam tagek yaņ tidoni! Nido jigı madepsi da jikon noman taņ damdisak. ^{2m}Yo

^f 4.7 Ep 6.12 ^g 4.8 Ais 1.16; Sek 1.3; Mal 3.7 ^h 4.10 Jop 5.11; 1Pi 5.6 ⁱ 4.12 Ro 2.1; 14.4 ^j 4.13 Lk 12.18-20 ^k 4.14 Kap 39.5,11; YT 27.1 ^l 4.17 Lk 12.47 ^m 5.2 Mt 6.19

morapji gat ae tilimji gat kili miktaŋ mudar. Ae imal morapji yo moniŋ da kili naŋ mudar. ³ Golji gat ae silwasi gat unun maŋut aŋ mudar. Unun maŋut da ji dakon yokwisi paŋnoman aban nomansi teŋteŋokdaŋ, aŋek maŋut da giptimji kindap da yaŋ soŋba sokdaŋ. Mibi bisap kili ununjok noman tokdisak, aŋakwan ji isal dogin yo morap gat moner gat paŋmuwukgaŋ. ⁴ Nandani. Pi monji da pigagasi jap pawit. Aŋakwa ji da yumaŋ nogini diwari paŋkutnaŋek diwari gin yomgwit. Moner diwat unun da Piŋkop da aŋpakji yokwi unun dakon kobogi damjak do madepsi yaŋ tidon. Ae pi monji unun dakon bupmi kunamyo da Amin Tagi Tapmim Ami da miragon kili pigigit. ⁵ Miktimon egipgwit bisap morapmon ji yo tagi tagi morapmi timigek disi dogin nandaŋek kisik kisik aŋek egipgwit. Jap morapmi naŋek madepsi tagawit, do dikba kimotni dakon bisap kili noman tak. ⁶ Amin kilegi gen yaŋ yomiŋek kili dapba kimakgwit. Unun iyi kutnok do yo kinda dima awit.

Nin tebai agek bisit aŋek Amin Tagi dakon abap do jomjom aneŋ

(Kilapmi 5.7-20)

Nin jigi guramigek Amin Tagi dakon abap do jomjom aneŋ

⁷Do not kabi, butji yawori taŋakwa jigi guramigek Amin Tagi da ae apjak unun do jomjom ani. Disi nandaŋ, pigagani toŋ amin unun jap tagisi kwokdaŋ unun do jomjom aŋegisak. Unun butni aŋteban aŋek yawori egek jomjom aŋakwan sikak gildatyo da pini aŋakwal don bami pasak. ⁸ Jiyo kisi butji yawori taŋakwa jigi noman taŋ damaŋ unun guramitni, nido Amin Tagi da apjak bisap unun kwaŋ tosok. ⁹Not kabi, notji do yaŋba yokwi tok dima aŋ aŋ ani. Piŋkop da gen pikon di depban. Nandani, Gen Kokwin Amin Madep yoma kagakon akdak.

¹⁰Not kabi, kombi amin kalip Amin Tagi da manon yaŋ teŋteŋok awit unun do nandani. Uwal da yo yokwisi aŋyomgwit, mani butni yawori taŋakwa jigi unun guramigkwit. Ji unun dakon aŋpak timigek yolni. ¹¹ Nandani, nin yaŋ yomaŋ, “Amin butni paŋteban aŋek yawori egek jigi guramigkaŋ unun Piŋkop da gisamikban kisik kisiksi ekwaŋ.” Jop dakon geni kili nandawit. Unun butni aŋteban aŋek yawori egek jigi morap noman taŋ imgwit unun guramigkit. Disi nandaŋ, don Amin Tagi da aŋpak tagisi aŋ imgut. Asi nandamaŋ, Amin Tagi da amin nin do but dasi galak taŋ nimisak, ae bupmi madepsi nandisak.

ⁿ 5.4 GT 24.14-15 ^o 5.5 Lk 16.25 ^p 5.7 GT 11.14; Jer 5.24 ^q 5.8 Ro 13.11-12; 1Pi 4.7
^r 5.11 TP 34.6; Jop 1.21-22; 2.10; Kap 103.8

Gen yaŋ paŋteban ak dima ani

¹² sNot kabi, gen madepsi kinda uŋun yaŋ: Ji Kwen Kokup bo miktim bo ae yo di da manon genji dima yaŋ paŋteban ani. Yo kinda ak do nandaŋ kaŋ “Asi” yaŋ gin yoni. Mani dima ak do nandaŋ kaŋ “Dima” yaŋ gin yoni. Genji yo di da manon yaŋ paŋteban aba Piŋkop da kobogi yokwi di daban.

Amin kilegi dakon bisit uŋun tapmimi toŋ

¹³ Jikon da kinda jigi pasak kaŋ, Piŋkop do bisit asak. Ae kinda dakon but kisik kisik nandisak kaŋ, uŋun Piŋkop dakon man aŋkisik do kap yosak.

¹⁴ tJikon da kinda sot asak kaŋ, paŋmuwukbi dakon kila amin yaŋ yoba opni. Aŋek Amin Tagi da manon bit nelak giptimikon soŋ imiŋek Piŋkop da aŋpulugaŋban kilek tosak do bisit ani.

¹⁵ uPiŋkop do nandaŋ gadaŋek bisit ani kaŋ, Amin Tagi da sot amin uŋun aŋmilip aŋek aban pidokdisak. Ae yokwi agit kaŋ, Amin Tagi da diwarini wiririk imjak. ¹⁶ Yaŋdo, ji kalon kalon diwarisi Piŋkop dakon miŋat aminyokon yaŋkwok ani. Aŋek ji kalon kalon Piŋkop da amin diwari paŋpulugosak do bisit ani, aŋakwa Piŋkop da ji paŋmilip asak. Amin kilegi kinda da bisit asak kaŋ, bisitni uŋun tapmimi toŋ, ae amin diwari tagisi paŋpulugogi. ¹⁷ vElaija miktim amin nin yombem. Mani sikak dima mosak do bisit tebai aŋakwan, sikak dima maŋakwan bilak 3 ae kanek 6 agit. ¹⁸ wDon bisit aeni aŋakwan kundu da sikak yipban maŋakwan pigaga jap aeni kwawit.

Kosit yipmaŋ dekgit amin abidaŋ aŋopneŋ

¹⁹ xNot kabino, jikon da kinda Piŋkop dakon gen bami yolyol kosit yipmaŋ degakwan amin kinda da abidaŋ aeni aŋopjak kaŋ, ²⁰ yuŋun amin aŋpak tagisisi naŋ asak. Gen on do pakyaŋsi nandani. Amin kinda yokwi pakpak amin kinda aŋpulugaŋek kosit yokwikon naŋ abidaŋ Piŋkopmon ae aŋopjak kaŋ, uŋun amin yokwi pakpak amin kimoron naŋ abidaŋakwan kimot dima asak. Ae Piŋkop da yokwi pakpak amin dakon yokwini morapmi yopmaŋ yomgut.

s 5.12 Mt 5.34-37 t 5.14 Mk 6.13 u 5.15 Mt 17.18-20 v 5.17 1KA 17.1; 18.1
w 5.18 1KA 18.42-45 x 5.19 Gal 6.1 y 5.20 YT 10.12; 1Pi 4.8